



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 326 Prot.

Tiranë, më 16.02.2017

VENDIM

Nr. 31, datë 16/2 /2017

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 "Për të drejtën e Informimit", shkronjës a) të nenit 31/1 të ligjit nr. 9887 datë 10.03.2008 "Për mbrojtjen e të dhënave personale" i ndryshuar, ligjin nr.10279, datë 20.05.2010 "Për kundërvajtjet administrative", Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi/ Qendra "Res Publica", përfaqësuar nga Z. _____, ka depozituar pranë Zyrës së Komisionerit ankesën nr.1516 Prot., datë 22.12.2016, me objekt "*Ankim ndaj refuzimit për dhënie të informacionit dhe kopje të dokumentave zyrtare*", ndaj Autoritetit Publik Instituti i Sigurisë Ushqimore dhe Veterinare.

Ankuesi në cilësinë e kërkuarit, nëpërmjet kërkesës datë 15.11.2016 ka kërkuar nga Autoriteti Publik/ Instituti i Sigurisë Ushqimore dhe Veterinare, t'i vihet në dispozicion informacioni, si më poshtë:

1. *A janë marrë masa për rritjen e buxhetit vjetor të Institutit të Sigurisë Ushqimore dhe Veterinarisë?*
2. *Në lidhje me pajisjet specifike si GC-MS, HPLC dhe sistemin AAS, në raport është konstatuar që blerja e tyre nëpërmjet procedurave të prokurimit publik përbën problem, pasi këto pajisje prodhohen vetëm nga një subjekt dhe importohen vetëm nga një subjekt. A janë ndërmarrë masa nga institucioni juaj për blerjen e këtyre pajisjeve pa procedurë prokurimi, nëse po, cila është procedura që është zbatuar për blerjen e këtyre pajisjeve?*
3. *Me qëllim që të reduktohen shpenzimet e institucionit, a koordinohet laboratorit juaj me laboratorët e tjerë, përpara blerjes së pajisjeve të reja, me qëllim përdorimin e pajisjeve ekzistuese?*
4. *A janë blerë dhe instaluar pajisje të monitorimit të sistemeve elektronike (UPS) për mbrojtjen e pajisjeve të ndjeshme?*
5. *A janë blerë pajisjet e nevojshme, në mënyrë që të bëhet e mundur zbulimi i pranisë së toksinave PCB?*
6. *A ka stafi i laboratorit akses në websitet e revistave shkencore periodike (që bëhen të aksesueshme me abonim) që lidhen me fushën e punës së tyre?*

Ankuesi pretendon se është cënuar në të drejtën për informim, pasi nuk është informuar lidhur me sa ka kërkuar dhe për këtë arsye ka depozituar ankim pranë Zyrës së Komisionerit.

Në ndjekje të procedurës për shqyrtimin administrativ të çështjes, Komisioneri pas vlerësimit të ankesës, me urdhrin nr.17 Prot. datë 18.01.2017, ka urdhëruar kryerjen e inspektimit administrativ pranë Autoritetit Publik/Instituti i Sigurisë Ushqimore dhe Veterinare. Gjatë inspektimit është konstatuar se kërkesa e Qendrës “Res Publica” është depozituar pranë Autoritetit Publik/Instituti i Sigurisë Ushqimore dhe Veterinare dhe është regjistruar me nr.826 Prot., datë 18.11.2016. Grupi i inspektimit konstatoi se, Autoriteti Publik/Instituti i Sigurisë Ushqimore dhe Veterinare nuk i ka kthyer përgjigje kërkesës së Qendrës “Res Publica” të datës 15.11.2016.

Pas shqyrtimit të ankesës, kryerjes së inspektimit, si dhe pas konsultimit të legjislacionit përkatës rezultoi se, informacioni i kërkuar nga Qendra “Res Publica”, përbën informacion publik dhe i duhet vënë në dispozicion ankuesit. Në kuptim të pikës 2, të nenit 2, të Ligjit nr.119/2014 “Për të drejtën e informimit”, *“informacion publik” konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik”.*

Bazuar në nenin 15 të ligjit nr. 119/2014 “Për të drejtën e informimit”, Autoriteti Publik trajton kërkesën për informim brenda 10 ditëve pune nga data e dorëzimit të saj. Në çdo rast, mostrajtimi i kërkesës brenda këtij afati konsiderohet refuzim dhe bazuar në nenin 18, pika 2 a) e ligjit nr. 119/2014 “Për të drejtën e informimit” përbën shkelje administrative.

Nga inspektimi rezultoi se Autoriteti Publik/Instituti i Sigurisë Ushqimore dhe Veterinare, nuk e ka trajtuar kërkesën për informim brenda 10 ditëve pune nga data e dorëzimit të saj, çka u vërtetua edhe nga kqyrja e regjistrit të protokollit, në prani të punonjësve të institucionit.

Pas shqyrtimit në tërësi të provave, Komisioneri konstaton se shkelja e kryer është mos trajtimi i kërkesës brenda afatit të parashikuar në ligj, e provuar kjo jo vetëm nga pretendimet e ankuesit në ankesë por edhe nga konstatimi i grupit të inspektimit në zyrat e Autoritetit Publik/Instituti i Sigurisë Ushqimore dhe Veterinare.

Bazuar në pikën 4 të nenit 15 të këtij ligji mos trajtimi i kërkesës konsiderohet *“refuzim”*. Bazuar në shkronjën “a” të pikës 2 të nenit 18 të ligjit nr.119/2014 “Për të drejtën e informimit”, *“Refuzimi i dhënies së informacionit, në kundërshtim me parashikimet e këtij ligji, dënohet me 150 000 deri në 300 000 lekë”*. Autoriteti publik/Instituti i Sigurisë Ushqimore dhe Veterinare nuk ka caktuar koordinator për të drejtën e informimit publik, gjë që prezumon se kompetencat e koordinatorit, përmbushen nga titullari i institucionit.

Në zbatim të pikës 3 të nenit 19, përgjegjësia për këtë kundërvajtje administrative është e titullarit të institucionit, i cili ka përgjegjësi administrative për mostrajtimin e kërkesës brenda afatit ligjor, në rastin konkret Z. _____, Drejtor i Përgjithshëm i Institutit të Sigurisë Ushqimore dhe Veterinare.

Në këto kushte, kur provohet mos trajtimi i kërkesës brenda afatit të parashikuar në ligj, ky mosveprim konsiderohet kundërvajtje administrative dhe në bazë të nenit 18 pika 2 gërma “a” sanksionohet me gjobë.

PËR KËTO ARSYE

Bazuar në shkronjën a) të pikës 2 të nenit 18, pikën 3 të nenit 18, pikën 4 të nenit 19, pikat 1 dhe 2 të nenit 21, nenin 22, shkronjat b) dhe ç) të pikës 5 të nenit 24 të ligjit nr. 119/2014 "Për të drejtën e informimit", ligjin nr.10279, datë 20.05.2010 "Për kundërvajtjet administrative", shkronjën a) të pikës 1 të nenit 18 të ligjit nr 49/2012 "Për organizimin dhe funksionimin e gjykatave administrative dhe gjykimin e mosmarrëveshjeve administrative", i ndryshuar,

V E N D O S A:

1. Pranimin e ankesës së Qendrës "Res Publica", nr.1516 datë 22.12.2016 kundër autoritetit publik/Institutit të Sigurisë Ushqimore dhe Veterinare, me objekt "*Ankim ndaj refuzimit për dhënie të informacionit dhe kopje të dokumenteve zyrtare*".
2. Urdhërimin e autoritetit publik/Institutit të Sigurisë Ushqimore dhe Veterinare, për vënien në dispozicion të informacionit sipas objektit të kërkesës për informim.
3. Dënimin e Z. me gjobë në vlerën 150.000 (një qind e pesëdhjetë mijë) lekë për shkelje të detyrimit të përcaktuar në nenin 19, pika 4. Masa e dënimit me gjobë, shlyhet me këste mujore. Gjoha ekzekutohet nga zyra e financës së Institutit të Sigurisë Ushqimore dhe Veterinare brenda 6 muajve nga data e njoftimit të vendimit.
4. Kundër vendimmarrjes në pikat, 1 dhe 2, palët kanë të drejtën e ankimit brenda 45 ditëve në Gjykatën Administrative Tiranë në përputhje me nenin 25 të ligjit nr. 119/2014 "Për të drejtën e informimit".
5. Kundër vendimmarrjes në pikën 3, personi ndaj të cilit është vendosur sanksioni administrativ ka të drejtën e ankimit brenda 30 ditëve në Gjykatën Administrative Tiranë, në përputhje me nenin 22 të ligjit nr. 119/2014 "Për të drejtën e informimit".
6. Ky vendim u dha sot në datë 16.2 .2017.

